

Matumuuna Inatsisartut Suleriaasianni § 33, imm. 4 naapertorlugu aalajangiussassatut siunnersuut manna Naalakkersuisut saqqummiuppaat:

ILO-mi isumaqatigiissutinik Namminersorlutik Oqartussat akuersissuteqarnissaat pillugit Inatsisartut aalajangiussinissaannut siunnersuut; nr. 98 (kattuffiliorsinnaanermut pisinnaatitaaneq aamma ataatsimoorussamik isumaqatiginninniarsinnaatitaaneq pillugit), nr. 100 (assigiimmik akissarsiaqarneq pillugu), nr. 111 (atorfinitsitaaneq suliffeqartitsinerlu pillugit), nr. 138 (suliffeqarsinnaanermut ukiukinnerpaaffissaq pillugu) aamma nr. 182 (meeqqanik sulisitsisarnerit ajornerpaat pillugit)
(Inuussutissarsiornermut Aatsitassaqaqarnermullu Naalakkersuisoq)

Tunngavigisaq

ILO-mi isumaqatigiissutit taakku tallimat suliniutinut angisuunut inatsisaasut maannakkut Inatsisartuni oqaluuserisassanngorlugit saqqummiunnissaat pisariaqartilersimavaat. Suliniutinut angisuunut inatsisaasut nunani tamalaani isumaqatigiissutit naapertuutsitarinissaasa isumannaarnissaat pillugit tunngavigisaasunik toqqammaveqarput, taamaattumillu Kalaallit Nunaata isumaqatigiissutit pineqartut taakku tallimat akuersissutiginerisigut ILO-mi pisussaaffigisanut naleqqiullugu Kalaallit Nunaata isummernissaa pisariaqartinneqarsimavoq.

Isumaqatigiissutit pineqartut taakku tallimat nunarsuarmi sulisartutut inuttullu pisinnaatitaaffinnut tunngasunut qitiusumik isumaqatigiissutaasunut arfineq-pingasunut ilaapput. Qitiusumik isumaqatigiissutit kattuffiliorsinnaanermik kiffaannngissuseqarnermut aamma ataatsimoorussamik isumaqatiginninniarsinnaanermut; pinngitsaaliilluni sulisitaqartarnerit sulluunniit atorunnaarsinnissaannut; meeqqanik sulisoqarnerup piviusumik atorunnaarsinnissaanut; aamma suliffeqartitsinermit inuussutissarsiornermullu tunngatillugu assigiinngisitsisarnerup atorunnaarsinnissaanut tunngaviusumik sulisartutut pisinnaatitaaffinnik imaqarput.

Aningaasaqarnikkut allaffissornikkullu sunniutaasussat

ILO-mi isumaqatigiissutinik pineqartunik akuersissuteqarnerup ilaatigut nassatarissavaa tamatuma kingornatigut Kalaallit Nunaata isumaqatigiissutit atuutsilernerit naapertuutsinnerilu pillugit ILO-mut akuttoqatigiimmik pisartutut nalunaaruteqartarnissaminut pisussaaffilerneranik, soorlulusooq nalunaarutit taakku ILO-p nammineq nakkutilliisarnermik aaqquussiviata malitseqartitsineranut ilaassallutik.

Naatsorsuutigineqarpoq nalunaarusiorneq suliassaqarfinnut akisussaaffeqarfinnut aningaasaliissutit pioreersut iluanni akilerneqarsinnaassasoq.

Isumaqatigiissutit nr. 98, nr. 100, nr. 111 aamma nr. 138 nunatsinni imaluunniit danskini inatsisaasunik allannguuteqartitsinissamik pisariaqartitsinngillat.

Beskæftigelsesministereqarfiup (Suliffeqartitsinermut Ministereqarfiup) isumaqatigiissut nr. 182-mik nunatsinnit akuersissutiginerata danskini inatsisiliornermut tunngasutigut isumaqatigiissummi artikel 3, litra b-mik naapertuutsitsiniarluni iliuuseqartoqarnissamik tunngaveqartitsissasoq nalilerpaa, taanna ”akissarsiutigalugu atortitsisarnermut meeqqat pillugit atuineq, innersuussisarneq imaluunniit neqerooruteqartarneq, pornolerinermut imaluunniit isiginnaagassianik pornoliornermut” tunngasuulluni. Pinerlunnikkut kinguaassiuutinik atuineranut tunngatillugu Kalaallit Nunaannut pinerluttulerinermi inatsisip allanngortinnissaata isumaqatigiissummi artikel 3, litra b-p atuutsinnissaanik nassataqassasoq Justitsministereqarfiup (Inatsisinik atuutsitsinermut Ministereqarfiup) nalilerpaa.

Attaveqatigiinneq

Inatsisartut siunnersuut akuersissutigisinnaappassuk Naalakkersuisut Justitsministereqarfik attavigissavaat pinerlunnikkut kinguaassiuutinik atuineranut tunngatillugu Kalaallit Nunaannut pinerluttulerinermi inatsisip allanngortinneqarnissaanik qinnuteqarlutik.

Tusarniaaneq

Siunnersuut piffissami 9. juli 2014 – 15. august 2014 tusarniaassutigineqarpoq aammalu tusarniaanermut nittartakkami tusarniaassutigineqarluni. Tusarniaanermut akissuteqaatit tusarniaanermut allakkiami ataatsimoortinneqarput.

Taamatut oqaaseqarlutik Naalakkersuisut inassutigaat ILO-mi isumaqatigiissutit nr. 98, nr. 100, nr. 111, nr. 138 aamma nr. 182 Namminersorlutik Oqartussat akuerisinnaagaat Inatsisartut aalajangissasut.

Ilanngussat:

- 1) ILO-mi isumaqatigiissut nr. 98-ip Kalaallit Nunaata akuersissuteqarneranut imaqarniliaq
- 2) ILO-mi isumaqatigiissut nr. 100-p Kalaallit Nunaata akuersissuteqarneranut imaqarniliaq
- 3) ILO-mi isumaqatigiissut nr. 111-p Kalaallit Nunaata akuersissuteqarneranut imaqarniliaq

- 4) ILO-mi isumaqatigiissut nr. 138-p Kalaallit Nunaata akuersissuteqarneranut imaqarniliaq
- 5) ILO-mi isumaqatigiissut nr. 182-ip Kalaallit Nunaata akuersissuteqarneranut imaqarniliaq
- 6) ILO'p isumaqatigiissutaa nr. 98 (kattuffilorsinnaatitaaneq aamma ataatsimoorluni isumaqatiginninniarsinnaatitaaneq pillugu)
- 7) ILO'p isumaqatigiissutaa nr. 100 (assigiimmik akissarsiaqarnissaq pillugu)
- 8) ILO'p isumaqatigiissutaa nr. 111 (atorfinitsitsisarneq aamma sulisoqarneq pillugu)
- 9) ILO'p isumaqatigiissutaa nr. 138 (sulilersinnaanermut ukiukinnerpaaffissaq pillugu)
- 10) ILO'p isumaqatigiissutaa nr. 182 (meeqqanik sulisoqartarnermi pissutsit ajornerpaat)